



Komunikadu Imprensa

16 Janeiro 2013

Proposta Orsamentu Aloka ba Tribunál sira iha Tinan 2013 la Suficiente

Iha loron 14 Janeiro 2013, komitiva Tribunál sira nian halo audiénsia ho Komisaun A Parlamentu Nasionál. Komitiva ne'e lidera hosi Merítisima Juiza Maria Natercia Gusmão hosi Tribunál Rekursu. Objetivu audiénsia ne'e mak atu apresenta proposta orsamentu ne'ebé aloka ba Tribunál sira iha Timor-Leste, inklui Tribunál Kontas ne'ebé foin atu hari'i iha tinan ne'e.

Sra. Natercia Gusmão iha ninia apresentasaun durante audiénsia ne'e nakonu ho lamentasaun. Representante Tribunál sira nian ne'e hato'o lamentasaun barak tanba orsamentu ne'ebé aloka ba Tribunál sira la to'o ka ki'ik liu. Orsamentu ne'ebé aloka ba Tribunál sira ne'e hosi montante inisiál ne'ebé propoin ho tokon USD7.250 hatun tiha ba tokon USD3,329 de'it bainhira sira simu "Envelope Azul" hosi Governu.

Tribunál sira nu'udar komponente prinsipál Órgaun Judisiáriu ne'ebé garante no fornese justisa ba ema hotu merese atu hetan alokasaun orsamentu ne'ebé justu no ekilíbriu ho orsamentu Órgaun Soberanu sira seluk. Alokasaun orsamentu ne'ebé suficiente bele fasilita servisu no funsionamentu sistema judisiáiru, tenik Diretór Ezekutivu JSMP Luis de Oliveira Sampaio.

Iha audénsia ne'e, Sra. Natercia haktuir katak kondisaun Tribunál Rekursu no Tribunál Distritál sira aat hotu ona. Tinan tolu liu ona mak Tribunál propoin ona orsamentu ba rehabilitasaun. Maibé to'o agora Tribunál sira nafatin seidak simu orsamentu ba rehabilitasaun nian, tanba osan ba Kapitál Dezenvolvimentu la iha.

Orsamentu aloka ba Kapitál Menór ho rihun USD13 mós la to'o atu sosa kareta. Kareta sira ne'ebé Tribunál sira uza barak liu mak kondisaun la dí'ak. Kareta sira ne'e mai hosi apoiu Primeiru Governu Konstitusionál iha 2006 no balun iha 2010.

Tribunál sira mós iha planu atu hari'i edifísiu ba Supremu Tribunál, edifísiu foun Tribunál Distritál Dili no sira seluk tan, maibé problema prinsipál mak orsamentu. Tribunál mós hakarak kontinua hari'i uma ba ofisiál justisa sira iha Tribunál Distritál sira seluk atu fasilita servisu administrasaun Tribunál sira nian, maibé orsamentu sai nu'udar obstákulu boot ida.

JSMP hein katak ho audénsia ne'ebé representante Tribunal nian halo ona ne'e, bele fó hanoin klaru ba Parlamen atu konsidera nesiedade real ne'ebé Tribunal sira infrenta.

Atu hetan informasaun kle'an liu tan favór kontaktu:

Luis de Oliveira Sampaio
Diretór Ezekutivu JSMP
info@jsmp.minihub.org

Telefone: 3323883 | 77295795
www.jsmp.tl